


Boda di plata di Coro La Escala

skirbi pa: Nelly Robles



Sinta riba trapi dilanti cas y cu e unico acompañaante, e sonido armonioso di anochi, mi a cuminza medita, di con tempo a pasa asina lihe, di mi experiencianan grato biba cu mi coro keri y mi a sinti con sensacionnan y emocionnan cu ta sacudi mi curazon a enbadi mi curpa.

E ora ey recuerdonan bunita, alegre, amargo, anecdótico; imagennan cu a keda graba den retina di mi alma, sonidonan cu ta resona den mi oído, a sa-

cudimi.

Esey ta cu, si tin algo cu ta uni hopi di e impresionnan di mi memoria, esey ta Coro La Escala cu dia 25 di e luna aki, diabierna awor, ta celebra su 25 aña di existencia, su Boda di Plata.

Un persona cu casi semper a mira di lomba, Sra. Maruja Forero Manrique, tabata creador y fundador di Coro La Escala. Cu hopi amor y entrega, un dia 25 di october 1988 el a cuminza e trayectoria di e coro

cu ta conta cu un estilo peculiar y cu semper a keda caracteriza di: trece hunto como ruman y difundí cultura Hispanoamericano, di Caribe y Hulanda.

Sra. Maruja Forero, durante 21 aña ininterumpi a ehecuta un trabao excelente y cu gran devocion te cu october 2009 cu pa motibo di salud el a delega direccion di e Coro den man di Sr. Hector Perez cu te awor ta asumi e tarea aki.

Ora mi visualiza e imagen

di e grupo, bisti na preto y berde speranza pa su presentacionnan di Gala o na blanco cu cora di alegria pa presentacionnan festivo y di Pasco; mi ta mira e sonrisa, amabilidad, e bo-luntad, devocion y amor cu cual cada un di e miembronan ta regala nan voz na esnan cu ta scucha.

E coro aki ta un solo voz cu identidad y pasion.

E ta un equipo conforma pa hombernan y muhernan di diferente edad, cultura, representativo di Aruba, Hulanda, Venezuela, Corsou, Colombia, Santo Domingo, Peru, manera ruman y uni den amor y cu un solo proposito: Sirbi nos prohimo desinteresadamente!

E equipo maravioso aki ta conforma pa: Hector Perez (Guitarista - director), Herman Hennepe (Director musical-guitarista), Michael Croes (cuarta), Tali Wever (cantante -guitarista), John Schaarbay (percusion), Manolo Hernandez (Percusion), Querino Ras (Cantante-percusion), Apolinario "Toni" Tromp (cantante), Marisella Bronswinkel (cantante), Mayra Lopez (Cantante),

Sheila Ho Sing Loy (Cantante), Fulvia Oduber (Cantante), Reyna Maduro (Cantante), Claret Quandus (cantante) y Piet Berkley (Miembro Honorario).

Cada presentacion di Coro La Escala ta como si fuera ta nan prome presentacion; maravioso, semper cu su integrantenan alegre, nunca nervioso pero si emociona pa expresa cu nan canto, e arte multilinguistico, multicultural, pues cu su repertorio bon escogi, nan ta canta y encanta nan publico oyente cu musica di folklore di paisnan cu nan ta representa.

Pa medio di e lineanan aki publicamente Coro La Escala ta gradici tur hende pa e confianza, apoyo y bon deseonan, na cada un di nos miembronan y nos ta spera cu Dios lo bendiciona tur y pa nan voz ta e vlam cu nunca ta paga pasobra e ta cendi cu amor, pasobra nan ta gargantanan di plata cu ta yena curazonnan cu alegria y pa nunca nan ta stop di canta pasobra nan canto ta yega cielo den un soño divino cu ta yena cu paz.